



## **MEMORIA XUSTIFICATIVA E ECONÓMICA DO CONVENIO DE COLABORACIÓN ENTRE O PARLAMENTO DE GALICIA, A VICEPRESIDENCIA PRIMEIRA E CONSELLERÍA DE PRESIDENCIA, XUSTIZA E TURISMO E A CONSELLERÍA DO MEDIO RURAL PARA A ORGANIZACIÓN DA PROVISIÓN E REPARTICIÓN DE MENÚS DE NADAL PARA AS PERSOAS EN SITUACIÓN DE VULNERABILIDADE AGRAVADA A RAÍZ DA COVID-19**

Esta consellería do Medio Rural é o órgano da Administración autonómica que ten atribuído o exercicio das competencias en materia de agricultura, gandería e industrias agrarias, e en consecuencia, nos programas relativos ós produtores de alimentos (explotacións agrarias), tal como se recolle no Decreto 149/2018, do 5 de decembro, polo que se establece a estrutura orgánica da Consellería do Medio Rural e se modifica parcialmente o Decreto 177/2016, do 15 de decembro, polo que se fixa a estrutura orgánica da Vicepresidencia e das consellerías da Xunta de Galicia.

No mencionado ámbito material, constitúe un dos obxectivos facilitar que as producións agrogandeiras galegas cheguen ós consumidores.

### **Antecedentes:**

Ademais dos efectos directos sobre a saúde das persoas que está tendo o COVID-19, as restriccións sanitarias que derivan do seu control está reducindo de xeito moi importante a actividade de diversos sectores económicos. É un feito que moitas persoas perderon o seu traballo ou negocio, especialmente no sector terciario.

O 20 de outubro de 2020, con motivo do Día Internacional para a Erradicación da Pobreza, o Parlamento de Galicia reiterou o seu compromiso coa necesidade de seguir avanzando na loita contra a pobreza e a exclusión social. Os deputados e deputadas da Cámara son conscientes de que os impactos socioeconómicos da crise sanitaria da Covid-19 están a intensificar a vulnerabilidade daquelas persoas que xa se atopaban nesta situación con anterioridade á pandemia, persoas e familias cos ingresos máis baixos, con traballos precarios e baixa intensidade laboral e con outros factores de risco, máis tamén, que as circunstancias sobrevidas están a levar a unha situación de serio risco de pobreza a persoas que non o experimentaran ata o momento.

A raíz do agravamento da crise social derivada da pandemia, as entidades de iniciativa social e particularmente aquelas que prestan o servizo de cobertura alimentos xa preparados, como as cociñas económicas ou os comedores sociais, están levando a cabo un enorme labor para dar resposta as peticións de cada vez máis persoas que se achegan en busca de axuda. Ao mesmo tempo, as entidades e os seus usuarios vense obrigados a adoptar protocolos de seguridade sanitaria, que no referente ao aforo dos locais habilitados para comer e en función da situación epidemiolóxica van desde a redución de comensais ata o propio peche. Ante estas circunstancias a



prestación da asistencia alimentaria supón un sobre esforzo económico e humano dificilmente sostible para as entidades, máis tendo en conta que a situación económica pre-covid está lonxe de se recuperar.

Por outra banda, as restricións sanitarias da primeira onda da pandemia tamén implicou a inmediata perda de ingresos de persoas agricultoras e gandeiras que comercializaban a través doutras actividades económicas que non foron consideradas esenciais (hoteis, restaurantes, cafeterías, mercados locais). Estes recursos económicos son imprescindibles para o sostemento de familias e explotacións no sector primario, sector que en Galicia ten unha relevancia e peso fundamental, ademais de ser o motor principal de dinamización do sector rural.

Ante esta situación, por Orde de 13 de abril de 2020 a Consellería do Medio Rural puxo en funcionamento unha canle alternativa para a comercialización de produtos agrogandeiros locais en Galicia, denominada Mercaproximidade, para facilitar a venda desas producións de calidade e facilmente identificables nos establecementos de venda de alimentos que permanecían abertos.

Así mesmo, ao abeiro do disposto no artigo 4.4 da Orde do 13 de abril e de conformidade co establecido na disposición adicional terceira da Lei 9/2007, do 13 de xuño, de subvencións de Galicia, a Consellería do Medio Rural veu adquirindo directamente producións de agricultores/as e gandeiros/as ou industrias de transformación de produtos agrogandeiros integrados na rede Mercaproximidade e cedeunos a comedores sociais, bancos de alimentos e centros sanitarios.

## **Finalidade**

O obxecto da colaboración entre o Parlamento de Galicia, a Vicepresidencia primeira e consellería de Presidencia, Xustiza e Turismo a través da Axencia Turismo de Galicia e a Consellería de Medio Rural é a organización dun sistema que permita a provisión e distribución a través de entidades de iniciativa social de menús de Nadal destinados ás persoas en situación de vulnerabilidade agravada a raíz da covid-19.

Esta colaboración ten como finalidade continuar a cooperación coas entidades de iniciativa social que realizan actuacións dos servizos de cobertura de necesidades de alimento, achegándolles menús elaborados con produtos agrogandeiros adquiridos directamente a agricultores, gandeiros e/ou industrias de transformación de Galicia xa elaborados a modo de menú e para a súa subministración en tempo de que sexan consumidos para a celebración da Noiteboa. A coordinación do proceso de elaboración dos menús e a súa distribución nos comedores sociais, cociñas económicas e outras entidades sociais que desenvolvan actividades análogas beneficiarias, levarase a cabo pola ONG World Central Kitchen coa colaboración de cociñeiros e cociñeiras galegos de prestixio.





**XUNTA DE GALICIA**

CONSELLERÍA DO MEDIO  
RURAL

Edificio Administrativo San Caetano, 5  
15781 Santiago de Compostela  
Teléfonos. 981 54 40 38 – 981 54 40 19  
Fax: 981 54 40 37

galicia

## **Réxime económico**

O compromiso económico do Parlamento de Galicia derivado do presente convenio é de vinte e cinco mil euros (25.000,00€).

O compromiso económico da Vicepresidencia primeira e consellería de Presidencia, Xustiza e Turismo a través da Axencia Galega de Turismo é de quince mil euros (15.000,00€).

O compromiso económico da Consellería do Medio Rural é de vinte e cinco mil euros (25.000,00€), con cargo á aplicación orzamentaria 14.04.713D.221.99 (código de proxecto 2015 00612).

O importe total do financiamento do presente convenio é de sesenta e cinco mil 65.000 euros

Para a tramitación deste convenio tense observado o cumprimento dos requisitos establecidos na Lei 40/2015, do 1 de outubro, de Réxime xurídico do sector público.

Santiago de Compostela, á data da sinatura.

O director xeral de Gandaría, Agricultura e Industrias Agroalimentarias

Asinado dixitalmente no lateral



**Xacobeo 2021**

